

# SA LIMBA SARDA



Sa Limba Sarda semper faeddada  
da su tempus de sas domos de janas  
fit da cuddas persones antzianas  
chi l'ant a sos fizos imparada  
cand'iscritura non si nd'agatàda  
in epocas remotas e luntanas  
in epocas de gherra e de paghes  
e prim' 'e fagher sos sardos nuraghes.

Sas zanas fint sos primos abitates  
non s'ischit da ue sunt pervennidas  
ca fint in sas campagnas riunidas  
peri sas percias biviant errantes  
de posca sunt bennidos sos gigantes  
ch'ant fatu sas nuragicas isfidas  
e si preguntas tzertos iscritores  
no ischint sos primos abitadores.

Amsicora fit primu generale  
e faeddàd'in Sard'in cumpagnia  
in Sardu narànt sa pregadoria  
a santos e a Deus immortale  
in Sardu in sa domo comunale  
già discurriant de ogni zenia  
si no est fizu de carchi bastardu  
totus onorànt s'idioma sardu.

**Pasquale Iscanu**

Bidoni, su deghe de Sant'Andria 1991

Su Sardu no est unu dialetu  
ch'est sa limba sarda armoniosa  
si descriet in rima e in prosa  
a chie l'at amore cun afetu  
a su tempus de su Re Gialètu  
in Sardu faeddiant dogni cosa  
a su tempus de sa sard'Eleonora  
in sa Carta de Logu b'est ancora.

In sas biddas, tzitades e famiglia  
sa limba sarda fit semper usada  
l'at Wagner su tedesc'istudiada  
sa limba sarda faghet meraviglia  
e sos poetas sardos de "s'Ischiglia"  
in sa rivista l'ant publicada.  
E m'auguro chi su Parlamentu  
ch'aprovet s'istatutu cun talentu.

No importat cantet campidanesu  
e su primu limbazu ch'est naschidu  
no important cantet logudoresu  
ca est pro su cantare preferidu  
no importat cantet su gadduresu  
ca no est de sos Sardos in olvidu  
sa limba sarda est su monumentu  
dae su Sulcis a su Gennargentu.

